

13 AUG 2000

Haji-Seminar

MALAYSIA TUAN RUMAH SEMINAR PERTAMA MENGENAI PANDUAN HAJI

KUALA LUMPUR, 13 Ogos (Bernama) -- Malaysia diberi penghormatan oleh kerajaan Arab Saudi untuk menjadi tuan rumah seminar panduan haji yang pertama kali diadakan di luar tanah Arab.

Ketua Pegawai Eksekutif Lembaga Tabung Haji Datuk Badroddin Kassim berkata sebanyak 49 negara Islam dan negara-negara bukan Islam yang menghantar jemaah haji ke tanah suci setiap tahun akan dijemput menyertai seminar dari 30 Sept hingga 2 Okt.

Sebagai contoh, walaupun Filipina bukan negara Islam tetapi memandangkan ia mempunyai jemaah haji, pihak menguruskan jemaah haji negara itu akan dijemput menghadiri seminar yang akan dirasmikan Perdana Menteri Datuk Seri Dr Mahathir Mohamad, katanya kepada Bernama.

Kira-kira 80 peserta termasuk ketua negara Islam yang diiringi menteri haji masing-masing dan ketua-ketua pengurusan haji negara bukan Islam dijangka menghadiri seminar itu.

"Kita bangga diberi kepercayaan menjadi tuan rumah seminar itu kerana ini membuktikan kepercayaan kerajaan Arab Saudi terhadap pengurusan haji kita ke tanah suci yang sempurna," katanya.

Badroddin berkata seminar kali ini akan ditambah skopnya mencakupi panduan mengenai persediaan ilmiah dan kerohanian untuk jemaah haji di seluruh dunia.

"Seminar di sini nanti mempunyai peranan yang lebih meluas dengan objektif tertentu ke arah memperbaiki pengurusan haji negara-negara itu berbanding yang lazim di adakan di Arab Saudi yang menekan kepada pengurusan haji," katanya.

Seminar itu diadakan tiap-tiap dua tahun di negara yang akan dipilih menjadi tuan rumah mengikut giliran.

Badroddin berkata beliau akan membentangkan satu kertas kerja mengenai cara pengendalian haji oleh Malaysia agar pengalaman negara ini dapat dikongsi bersama dengan peserta di seminar itu nanti.

Tiga lagi negara yang akan membentangkan kertas kerja pada seminar itu ialah Turki, Jordan dan Senegal.

Seminar yang dianjurkan oleh Kementerian Haji dan Wakaf Arab Saudi itu lazimnya diadakan dalam musim haji bagi membolehkan kerajaan negara itu mendapat pandangan mengenai pergerakan dan aturan yang dilaksanakan dalam musim haj.

Katanya walaupun Malaysia menjadi tuan rumah, urusan dan tanggungjawab seminar termasuk jemputan adalah dibawah Kementerian Haji dan Wakaf Arab Saudi.

Selain bermesyuarat, para peserta akan dibawa melihat pengendalian kursus haji oleh Tabung Haji dan melawat Melaka.

-- BERNAMA

ARA ES RON